

❖ Sur Luregn Rageth, resignat

Ils 15 de settember 1966 han ins surdau al tratsch benediu sil santeri de s. Gion a Domat las restonzas terrestras ded in venerau e bien augsegner romontsch, che mereta segir caudla menziun en la Gasetta Romontscha, rev. sur Luregn Rageth oriunds de Domat, nua ch'el passentava ses davos dis terresters sco digna pagaglia per sia lavur sacerdotala ded onns ed onns.

Sur Luregn Rageth ei naschius a Domat ils 2 de fevrer 1881 da buns e pietus geniturs. Leu ha el frequentau sias scolas primaras per suenter sededicar al studi gimnasial, perquei ch'el fuva secedidus de pli tard daventlar spiritual e dedicar sia veta alla pastoraziun dellas olmas immortalas. Il pleon da gliez temps a Domat, sur canoni Cavelti haveva in bien dun de rabbitschar neuadora las clamadas sacerdotallas, mo viveva quel lu pilvermo era en tut in auter temps, che quel ded ozildi. Lu regeva la sempladad nos vitgs, la cumentientscha fuva la regina dellas casas e famiglias, igl ambient era compacts e zun favorecivlas per la promozion de talas semenzas divinas els cors dils buobets sils bauns de scola. Las purginas savevan era da lezzas uras lavagar il schiermtschentau el profund dil cor human, ellas fu van buca schi racentes e murdentas sco quellas ded ozildi. Sur can. Cavelti lai vegnir in pader franzos, in P. Barral cun in de ses confrars per dar als affons de scola ina biala orientaziun sur la clamada sacerdotala. Forsa fageva el quei adina puspei era en fatgs e damondas ded autres clamadas. Fuss quei stau il cass, lu fuss el staus pli moderns en sias metodos pastorals che ozildi ni silmeins aschi moderns. Quella viseta e quei sclariment oreifer haveva tuttina giu il success, che 5 buobs de Domat ein quei atun serendi ad Immensee per entscheiver lur studi gimnasial. Malgrad che quei pader Barral fuva da lezzas uras alla testa ded Immensee astg'el buca vegnir quintaus per il fundatur de quella societad missionara ded Immensee, mobein il canoni grischun e puschlavin, Sur Bondolfi. Savens hagi sur Rageth rugau cun tutta fervur tier s. Antoni, il patrun della casa ded Immensee per sia futura clamada sacerdotala.

Suenter haver absolviu il studis gimnasials ad Immensee ha Luregn Rageth astgau serender a Ruma e continuar quels al collegi della Propaganda Fide ed ha serrau quels studis cun la dignitat ded in docter della filosofia. Ils biars de ses confrars han per decennis buca saviu, che sur Rageth seigi in «doctor Philosophiae». Bein sentey'ins dapertut, seigi en priedis ni ductrinas sia gronda savida, el plidava era cun slonsch in triep lungatgs; mo sia modestiad era schi gronda, ch'el zuppentava talas «picculezzas» mundanas cumpleinamein. Da

1905—1909 studegia Sur Rageth la s. teologia a Cuera el seminari de s. Glieci, celebrescha 1908 sia Messa nuviala ad Immensee egl institut de Bethlehem. Siu giavisch fuvan las missiuns. Denton neschan difficultads materialas e finanzialas egl institut de Bethlehem e quel stat sigl ur dil precipizi. Ruma haveva gia renconuschiu Bethlehem sco «quasi-congregaziun», ch'ella vegn sligliada si ed ils paders e members della congregaziun incorporai als uestgius ni ad autres congregaziuns ni surdai alla missiun externa. Sur Rageth sedezida per la missiun, s'unescha culs «paders alvs» e se renda en Algeria per leu purtar igl evangeli als pagauns. Mo gia suenter dus onns sforza la sannadil il fervent missionari de returnar a casa e Msgr. Dr. Georgius de Grüneck pren si el cun bratscha aviarta. El tarmetta quella giunga forza si els cuolms uranès sco provisor e scolast secundar a Caschanutta. El havess saviu surprender igl uffeci parochial, mo sedecida de restar il caplon e survient dil niev principal sur Giachen Ant. Fetz. — Suenter entgins onns de bona pastoraziun en scola e baselgia, vegn Sur Rageth numnaus caplon de Tujetsch e resta leu en quella qualitat ca. 30 onns. A Tujetsch/Sedrun ha Sur Rageth unfriu las forzas de sia veta. Tgi che ha enconuschiu quei spiritual pli internamein, quel capescha, ch'in confrar ha cuort avon sia mort detg ad el: Nus engraziein a Vus per Vies bien exemplar, che Vus deis a nus spirituals. En ses vegls dis muncava el darar ina mesa ura avon sia s. Messa en baselgia parochiala a Domat, e quei entochen ils davos dis de sia veta.

Sur Rageth fuva in um cun in zun spiritus humor, zun emperneivels en cumpignia, in profund predicator e surtut in carstgaun humilitivel. El ei restaus ina entira stendida veta «mo caplon» mo havess pliras gadas giu la pussevladad de sesalzar e daventlar pleon cun sia dignitat, mo era cun sia pli gronda responsabladad. Nus sbassein il tgau en reverenza avon quei um e sacerdot, ed il til funeral ha era mussau, ch'el gudeva quella stema e carezia denter pievel e confrars.

Naschius da Nossadunna de Candeilas, morts il num de Maria e satraus il di dellas 7 dolurs de Nossadunna, che vegn festivaus la primavera cun gronda pumpa en sia pleiv nativa a Domat, astgein nus era quintar, ch'il veneratur de Maria Sontgissima hagi anflau quella buna mumma leuvi el reginavel celestial. Da Maria di il cudisch sogn: Quel che anfla mei, anfla la veta perpetna. Detti Dieus al car confrar la veta perpetna, la pagaglia perpetna, e la visiun beatifica. Il fideivel survient, staus fideivels sur pauc cheu sin tiara, vegn tschentaus sur bia leuvi el reginavel de perpetna gloria. Car amitg e confrar: Ruaussa en pasch! (*)

sur dr. Lorenz Rageth (1881-1966)

Ils 12 da settember secumpleinan ils 25 onns dapi la mort da sur Lorenz Rageth. En ses 58 onns da sacerdozi ha el semnau rehamein igl èr dil Segner. Da quels ha el dedicau 38 onns alla pleiv da Tujetsch. Ils parochians da sogn Vi-geli vegnan ad haver teniu en buna memoria lur caplon. Ad el seigien questas lingias dedicadas sco mudest matg sin sia fossa a Cuera.

Studi

La schlateina Rageth meina nus immediat a Domat. Leu ei Lorenz Rageth naschiuss iis 9 da fevrer 1881. Cheu eis el carschiuss si ed ius a scola e lu daventaus in gimnasiant ad Immensee. Quei visa-gia a sia intenziun da daventar missiunari dils pagauns. Ils studis filosofics fa el a Roma al collegi da Propaganda Fide.



Igl onn 1622 veva il papa Gregori XV. scaffiu ina nova congregaziun da cardinals, per la propagaziun dalla cardientscha. Tschun onns pli tard, 1627, ha quella fundau in agen seminari per scolars missiunaris pils pagauns e per la patria. Students da tuttas naziuns sanflavan cheu. Sco in dils pli impur-tonts scolars ei sortiu da quei collegi, 1847, igl Englès John Henry Newman, il convertit e cardinal da pli tard (1801-1890). Papa Clemens XIV. veva concediu 1773 a quei collegi divers pri-vilegis. Mintgamai da Tschuncheismas astgava in student da quei collegi far in priedi sur dil s. Spért en preschientscha dil papa. Da Sontgilcrest purtavan students dil collegi il baldachin papal ella processiun. E da Gievgia sontga lavava il papa ils peis a dus students dalla Propaganda. Al rectur digl institut veva il papa concediu la facultad dad ornar ils students, suenter il studi cumplet, cul tetel da docter. Da quella incumbensa fageva quel lu diever bein bugen, gene-rusamein e liberalmein. Aschia ha era Lorenz Rageth saviu bandunar il collegi, 1905, culla capiala da dr. phil. Il studi teologic absolva el a S. Leci a Cuera, da 1905-1908.

Stola

Ils 2 d'ouost 1908 retscheiva sur Rageth il s. Sacrement digl uorden ad Immensee. Per in onn anflein nus il neosacer-

dot sco proviser a Parsonz. Uss seregh-ghia il desideri da missiunari. Sco member dalla congregaziun dils paders alvs operescha el sco missiunari ella Algeria africana. Sia sanadad surporta denton buca quei clima meridiunal. Suenter dus onns, 1913, tuorna el ella patria e lavura ella diocesa, vi gl'Uri, a Caschiniutta, e quei sco caplon e scolast secundar pigl interval da nov onns, da 1913-1922. El havess era saviu surprender igl uffeci da plevon dil liug, ha denton preferiu humilitatevlamein da restar caplon e quei per veta duronta.

Il settember 1922 arriva sur Lorenz a Sedrun e resta leu sco caplon entochen che la vegliadetgna camonda, 1960, la retirada. Igl «otium cum dignitate» gauda el en siu vitg natal a Domat entochen la mort.

Stema

Sur Lorenz Rageth era vestgius cul ha-bit da humilitanza e mudesiadad. Quei fuva siu bul, il sigil da siu caracter. El duvrava mai siu tetel academic. Denton percurschevan ins dapertut, en priedis, ductrinas e raschienis sia vasta savida. El plidava cun franchisezia in triep lungatgs. Cun siu humor spirtus derasava el hilaritat en cumpignia da confrars e da laics.

Da sia pietusadad lein nus pli bugen buca ruschanar. Edificont era ei tuttina da veser el, en ses vegls dis, ina mesa ura avon la messa en baselgia, enschan-gliaus avon il Sontgissim.

Quei veneratur da Nossadunna ha segir era giu ina leva mort, il di dil num da Maria (12-09) e satraus il di da Nos-sadunna dallas Dolurs (15-09), da Nos-sadunna, dalla qualla la s. Scartira di: «Tgi che anfla mei, anfla la veta.» Sur Lorenz Rageth, nus engraziein a Ti - sco in confrar ha detg sur sia fossa: «Nus engraziein a Vus per Vies bien exempl, daus a spirituals ed a laics.»

sur Felici Maissen